

Predstavljen Nacrt zakona o zaštiti od klevete u Brčko Distriktu

Nacrt zakona o zaštiti od klevete Brčko Distrikta BiH predstavljen je danas poslanicima u Skupštini Distrikta, članovima Vlade, nosiocima pravosudnih funkcija u Distriktu i medijima. Prezentaciju je organizovala kancelarija OHR-a Brčko u saradnji sa Skupštinom Distrikta i Linijom za pomoć novinarima. Zakon o zaštiti od klevete reguliše građansku odgovornost za klevetu na teritoriji Brčko Distrikta BiH.

Slični zakoni su već usvojeni u Federaciji BiH i Republici Srpskoj, gdje primjena ovih zakona osigurava slobodu izražavanja, istovremeno definišući mjere zaštite lica od klevete. Nacrt zakona se zasniva na evropskim standardima, a odnosi se i na važnu ulogu "čuvara" prava javnosti na informisanje koju mediji obavljaju.

Pravo na slobodu izražavanja zajamčeno je Evropskom konvencijom o zaštiti ljudskih prava i osnovnih sloboda, Ustavom Bosne i Hercegovine, Statutom Brčko Distrikta Bosne i Hercegovine, i predstavlja jedan od osnova demokratskog društva.

Zakon o zaštiti od klevete će biti stavljen u skupštinsku proceduru na sljedećem zasijedanju Skupštine, zakazanom za 25. jun 2003.